



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Trump-i Supreme Court dang tariffs ken
o nung obendang melenshitsü ashi

Amit Mishra cricket asaya
nungi anisüngzüke



VOL. XXII ISSUE NO. 322 (ADOK 322)

DIMAPUR

ROGONÜ (FRIDAY)

RONGJUI (SEPTEMBER) 05, 2025

₹ 5.00

Asen takum nung tesayurtem ya len aniba tesangwa lir: CM Dr. Rio

Dimapur, Rongjui/September 04 (TYO): Teachers' Day (tesayurtem anogo) nung Chief Minister, Dr. Neiphiu Rio-i Nagaland nung aliba tesayur ajunga den salem lemsatep.

Asen tesayur temi kangasa nüngdakba shilem agia asen chir aser lanurtem tekolok shisatsü yanglua tarutsü jenjang tajungba kumdaktsütsü asoshi longzüng azüngtsüba atema akhum agüja iba anogo amunger, ta CM Rio-i ashi.

Asen takum nung tesayurtem ya len aniba tesangwa, shisatsü agütsür, nüngdakba yimyatam sayur aser putu aika mangdang yur takok angutsü asoshi ajungmesor. Parnoki bendanga

agütsüba, taremzüik yimya aser anibelem mesasai tenzüikba ya tawajem, terenlok aser tesunep aliba lokti yangerba nung tamendak dak long ka ama lir.

Technology aser maparen tasen asateta kanga kera melenshia aoba putu ka nung lanurtem lenmang shidak nung anitsü asoshi tesayur shilem ya tali tongtipang lir.

Education system tashi itshitsü, tesayur nem tashi tali agütsütsü aser parnoki langa aliba ama tesayur mapa tajung asoshi tetushi aser akumtsübo agütsütsü temulungtetba nung sorkar akang-akanga nokdaka lir, ta pai ashi.

PMI to WTO nung Minister (Customs) ama Limatula Yaden, IRS shimogo

Dimapur, Rongjui/Sept. 04 (TYO): Permanent Mission of India (PMI) to the World Trade Organization (WTO), Geneva nung 1996 batch (Customs & Indirect Taxes) officer Limatula Yaden, Indian Revenue Service (IRS) ya Minister (Customs) ama inyaktsü shimba Government of India-i agizükogo.

Ganesh Dutt Lohani, IRS (C&IT:1993) melena la shimba ya Appointments Committee of the Cabinet (ACC) ajanga jangjatsü aser lai Department of Commerce kübok inyaktsü.

La indang kümsük ya mapa agizükba anogo nungi küm asem mesüra tarutsü nung totuyuba ka

magütsü tashi inyaktsü, ta Department of Personnel and Training (DoPT) sangdong ka ajanga ashi.

India indang Permanent Mission to the WTO nung Minister (Customs) yagi alima nung shishilempaba ken o jembidang India tenüng nung shilem agir, mangatettep benteter aser WTO inyakyim kübok ken o balala jembir.

Alima nung rongsenketzüng indang jembishinüba tsütsü customs duties, trade barriers aser tariff özüng tem nung temulung kanga agütsüba mapang iba mapa ya kanga tongtipang lir.

COVID mapang shimer regularize asüba maparen soita atar

Dimapur, Rongjui/Sept. 04 (TYO): Gauhati High Court, Kohima Bench ajanga September 3, 2025 nü interim directive ka agütsüba sülen Department of Health and Family Welfare ajanga COVID-19 pandemic mapang post yanglua nübu shimba regularize südaktsütsü asoshi inyaka aliba maparen soitogo.

Cabinet ajanga August 6, 2024 nü telemtetba agiba asür iba sülen August 18, 2025 nü sangdong agütsüba soita atatsü

court-i totuyuba agütsü, ta sangdong ka ajanga ashi.

Cabinet telemtetba aser sangdong agütsüba nung ajemdaker state respondents ajanga regularization atema mera kecha magütsü, ta court-i tuyu.

Yangji ajemdaker Department Screening Committee ajanga post balala regularize asütsü maparen inyaka aliba ajunga tarutsü nung totuyuba ka magütsü tashi meinyaki atatsü, ta department ajanga metetdaktsü.

Nagaland Assembly nung bill ana agizük

Kohima, Rongjui/Sept. 04 (TYO): Brehostibarnü Nagaland Legislative Assembly nung "The Nagaland State Finance Commission Bill, 2025" aser "The Nagaland Flood Plain Zoning Bill 2025" agizükogo.

Bill anaprong ya Chief Minister Dr. Neiphiu Rio-i session tenzüikba anogo, Mongulbarnü benoka liasü.

Ajisüaka opposition maliba House nung züngsem katia temelenshitsü mashiba yong Bill anaprong ya voice vote nung agizüka liasü.

Nagaland State Finance Commission Bill nükjidong ya local bodies dak sendakba nung

state asoshi State Finance Commission ka tentettsü asoshi lir, ta Rio-i ashi.

Fiscal decentralization tajungba nung ketdang asütsü, local governance tashi itshitsü aser local bodies aser rural local bodies tem nem pei mapa tajungtiba nung inyakdaktsütsü asoshi iba Bill ya benoker, ta ashi.

Iba Commission yagi state nung local self government nem senotsü timi lemsatsütsü, panchayats aser ULBs indang senotsü jenjang asadangtsü, ta pai ashi.

Flood Plan Zoning Bill ya state nung ayongtem indang flood plains tem lemsatsütsü asoshi lir,

ta CM Rio-i ashi.

Flood Zoning Authority ajanga ayong anasa aliba tesemtem survey agia ayong indang flood plains yimya asadanga jangjatsü.

Flood Plain Zoning Bill nükjidong ya ali amshiba özüng yanglua azüoktsü, tzümetsüng adoktsüba tesemtem nung terenlok mapa inyaktsü aser tzümetsüng agi teraksa agütsüba azüoktsü asoshi sentongtem yanglutsü, ta shia liasü.

Iba sülen NLA Speaker Sharingain Longkumer-i bill anaprong ya Brehostibarnü benoka jembir agizüktsü ta ashi, koba tang session asoshi anogo tatembang alitsü.

Y. Patton-i DAB nung evection drive indang jangjatsü

Kohima, Rongjui/September 04 (TYO): Tawa Nagaland-Assam arütsülen Disputed Area Belt (DAB) nung evection drive agiba indang Deputy Chief Minister Yanthungo Patton-i tanü Nagaland Legislative Assembly nung tatongi lemsatep aser Chief Minister Dr. Neiphiu Rio lenisüba kübok state sorkari tensa kanga junga asadangtar ta ashi.

Reserve Forest area nung Assam ketdangsur temi survey agiba osang ya July 16, 2025 nü mezüng angu aser iba sülen Uriamghat nung aliba Nagaland indang Border Magistrate-i Sarupathar nung kasa ketdangsur den July 17 nü ken o benoka site verification ao. Ajisür Niuland, Wokha aser Golaghat district tem indang DCs aser SPs tem den July 22 nü senden amen, ta pai ashi.

July 24 nü Patton den MLA Achumbemo Kikon, Lotha Hoho, Lotha Student's Union aser Western Sumi Hoho ketdangsurtemi Wokha aser Niuland nung kongshia aliba

tesemtem semdang. Iba sülen telok ka kisüngi mera agiba nungi kumzüksü aser illegal immigrants tem aitba nokdangtsü mechi Nagaland aser Assam ketdangsurtem lungjemer evection drives ya agitsüla ta State Cabinet nung pangjem ta ashi.

August 21 nü Assam indang Forest Department ajanga Wokha District nung nisung meindoker alidak süngdong-lidong tema boundary pillars azüngtsü sentong yanglur ta osang angazüka Nagaland Chief Secretary-i sangdong ka nung DAB nung süngdong-lidong atemba maparen külemi inyaktsüla ta ashi. Kasa anogo Wokha aser Golaghat nungi DC-level senden ka amen.

State anaprong indang CMs tsüngta jembishinü akaba sülen Assam Environment and Forest Minister den Patton senden ka mena CM level nung telemtetba ka magi tashi mapa kecha meinyaki atatsü lemtet.

Maneni Nagaland Cabinet

ajanga illegal immigrants tem aridoktsüla aser maparen ajak state ana külemi inyaktsü pangjem, aser Union Home Minister dangi DAB nung 1972 Interim Agreement nung aibelena Assam Police aliba indang tebilemtsü lemsatepa shiti zülutsü lemtet.

DAB nung CRPF inakyim ya state ana indang command nung masü saka Assam indang ADGP (Border) kübok lir, ta pai ashi.

Cabinet nungsa arütsülen mangatettep adokba mapang tekeraba nung bentetratettsü asoshi Border Affairs, Police aser Forest Department nungi nübu shimoka Special Border Response Force (SBRF) ka amenoktsü jembir.

State sorkari iba ken o nung temulung agütsür aser Centre aser Assam den tanen makai jembishinür, ta ashi aser CSOs, nüburtem aser media dang mejangjaba osang meporokshitsü aser sangdong tejangja sorkari agütsütsü, ta Dy. CM Y Patton-isa ashi.

MLA Dr. Rhutso-i reservation policy melenshitsü ayongzüik

Kohima, Rongjui/September 04 (TYO): Nagaland indang sorkar mapa nung menden wazüka yutsüba nung tang tashi ajak sako maliba tutetja National People's Party (NPP) MLA Dr. Tseilhoutuo Rhutso-i Brehostibarnü sorkar dang shidakba tajemzüikba jenjang nung alir nem tajangzüik ya agidaktsütsü asoshi temelenshi alitsü ayongzüka liasü.

Assembly nung Zero Hour mapang Rhutso-i iba onük benoka jembidang, Advanced Tribes (AT) shilem 70 nungi 80 tashi aser Backward Tribes (BT) shilem 10 nungi 20 tsüngta anisüngzüka jangratema alir, aser AT shilem 20 nungi 30 tsüngta aser BT shilem 80 nungi 90 jungnüa education,

exposure aser maongka balala nung dangar memenep lir, ta ashi.

Reservation system ya category anaprong nung creamy layer ajanga shilem tuluba agiogo, aser ibaji chichiba nükjidong ama masü, ta pai ashi.

Grade III aser IV posts nung kin tenet asoshi menden shilem 25 wazüka yutsüba ya mezüng 1977 küm nungi amshi, aser 1979 küm Zelian kin bendenlokba sülen shilem 33 kumtsü aser technical aser gazetted posts inoksem, ta MLA Rhutso-i ashi.

Iba sülen 1989 küm Backward Tribes asoshi reservation ya mapang telatet makai atsülangtsü. Pochury ya BT toku buba ama 1994 küm agizük aser 2008 küm committee

kati anüdoklen kin trok asoshi shilem 25 aser danga kin pezü asoshi shilem 12 wazüktsütsü tangatetba lemsatep aser ano committee kati iba inakyim ya küm 15 atsülangtsü.

Backlog vacancy system ya 2015 nungi amshi tenzüik aser 2022 küm Tikhir ya BT ama agizük saka quota timba mekumtsü aser Cabinet-i iba policy ya taruba census sülen reprangshitsü pangjem.

AT/BT categories melen jenjang tajungba nung aliba kin ya General Category nung aitdaktsütsüla aser tajemzüikba jenjang nung alirtem Reservation Category-i 50:50 telemsa nung aitdaktsütsüla, ta Rhutso-i ashi.

(Maneni tapak 2 nung...)

Office of the

MONGSENYIMTI WATSÜ TELEN

AITSÜR

Meimchir nüji shisatsü nung maketba kangokkangchi mapa inyaka Wb. Rongpangkangzuk (Kangtsung) ajanga arishi küm 7 jala ka dak tashiyim mapa inyakba angashia Mongsenyimti Watsü Telen kanga aoksar aser koremer. Iba tamachi mapa inyaka asen temerük sobaliba menentsür nisung ka arok atongsema alitsü temeden maka ta khukhua özü Mongsenyimti Watsu Telen-i ajangajanga aitsür.

Iba aibelen keno dak sentakba nung pangdak özüng ketdangsurtemi tapet ochi obendang agütsütsü akanger aser iba ochi rara nung Mongsenyimti Watsu Telen ajanga tatem tashi nungita nokdaktsü ta ayimoktsür.

Sd/-

**Wt. Rongsensangla,
Tir**

Sd/-

**Wt. Imlisongla
Tezülur.**

Don Bosco College Kohima nung 1buba MA Fresher's Day mungogo



Kohima, Rongjui/ September 4 (TYO): History & Sociology Department indang mezüngbuba postgraduate kaketshirtem pelashishia agizüka Don Bosco College Kohima nung September 2 nü mezüngbuba MA Fresher's Day mungogo.

Iba sentong ya college inyakyim nung alizüing tasen ka tongtetba asütsü, aser iba ajanga shisaluyim nung college inyakyim atsülanga aoba sayur, ta Secretary, DBCK Media Cell Rüguophrenuo Nishi Solo-i ashi.

Sentong nung Pro-Vice Chancellor, Nagaland University, Kohima campus, Meriema Prof. N Venuh alakteta jaoker liasü.

Sentong nung o jembiba mapang Prof Venuh-i kaketshirtem dang süoki ia aser nendak nendaka maongkatem agitsü ajungshia liasü.

Paisa, social media sabang balala nung nüburtem anisatsüsa osangtem prokshiba nungi jenboa alitsü ajungshia liasü. Maneni pai Don Bosco College Kohima nung azüingba mapang takokba tashi angazüka lokti nung khuret angatetba aser tangari akümtsübuba nübu kaka akümtsü asoshi inyaktüsü ayongzüka liasü.

Sentong nung SDB, Principal, DBCK Fr. Dr. Tious Varghese-i lokti pela agizükba o jembiba. Sentong nunga History Department nungi BA 3rd

semester kaketshirtemi sentong tapu balaka saya.

Kasa mapang nung kaketshir tasentem tenüing nung M. Trani Rakha (MA 1st semester ,Sociology) aser Virenthung Y (MA 1st semester, History) nati o tatsütsü jembiba.

Iba sentong ya Chemla Chemtok (BA 5th semester , Sociology) lenisüba nung agi aser SDB, Rector, DBCK Fr. Dr. Xavier Mattam-i Tsüingrem temaotsü meshizüka sarasadema liasü.

Sentong ya Assistant Professor, Department of History, DBCK Dr. Lanukumla Ao-i tepela o jembir tembanga liasü.

Nagaland Angh aser NSF-i Tesayurtem anogo salem lemsatep

Dimapur, Rongjui/ September 4 (TYO): Nagaland Angh Ajay Kumar Bhalla-i, tesayurtem anogo amungba mapang Nagaland aser linük ajunga nung tesayurtem den salem lemsatepba den parnok dang kanga pelaba lemsatepogo.

Linük yangertsü atema tesayurtemi anibelem mesasai inyakba atema parnok nem tenüingsang agütsüba den Angh-i, tesayurtem ya shisaluyim tamendakdak, shirnoki kaketshirtem dang len sayur, parnok ajungmesor aser linük nung lanurtem aniteter ta ashi.

Angh-isa, State Level Teachers' Awards aser National Teachers' Awards 2025 agizükertem nem tenüingsang agütsü. Pai parnok sangrasangji, tejangraba aser tatishitsü keta inyakba atema

tenüingsang agütsüba den, parnok ya Nagaland atema nemadangtsü aser tesayur ajak ajungmesor kaka lir ta ashi.

Kasa mapang nung Naga Students' Federation (NSF)-ia Tesayurtem anogo amungba mapang Nagaland nung tesayurtem ajak den salem lemsatepba den parnok dang kanga pelaba lemsatepogo, shirnoki sayutsü atema parnok taküm bendanga agütsüogo.

Iba anogo ya parnok mapa tushiba anogo dang masü saka parnoki bendanga agüja inyakba, aremzüka temeim agi lanurtem aniteter atema parnok mapa benjungba anogo ka lir.

Alima kanga kara renloka aoba mapang ka nung kaketshirtem tenüingdakba aika adoker aser item ajak atema tesayurtem inyakyim den liromedema aintsü nüingdaka kümogo, koba temela masü.

Item tetsüdahtsütem aika liaka tesayurtemi maneni meranga inyaka tangazüker ajak mulung nung meranga, ochishia aser akümtsübu agüja alitsü aser inyaktüsü asoshi yimyayimpongtem inokja arudar.

Iba anogo amungba mapang Federation-isa, tarutsü lokti yangertsü atema tesayurtemi tongtibang shilem agiba bilemteter aser iba ajanga dang Naga lima tamendakdak yanger, ta ashi.

Maneni NSF-i tesayurtem dang parnoki anibelem mesasai bendanga agüja inyakba atema kanga pelaba lemsatepba den, Naga nung lanurtem nem kaketshisatsü agütsütsü aser parnok nem tashi agüja ajungkettsü atema tesayurtem den NSF-a nokdaka aliba kasa sangdong ajanga metetdaksüogo.

Benjung ya chichiba tanüla agi amungtsüla: Keoshu

Dimapur, Rongjui/ September 4 (TYO): Public Ground, Longkhim, Tuensang nung September 4 nü Mungmung benjung kanga meraketa mungogo. Iba sentong nung Advisor Youth Resources & Sports, and Chairman, DPDB Shamator, S. Keoshu alakteta jaoker liasü.

Sentong nung o jembiba mapang Keoshu-i, küm ka tepeyong kanga meranga inyakba sülen iba benjung ya amunger ta ashiba den, sentepa aliba lokti dang Mungmung benjung tanüla chichiba benoka amungtsü aser kidangertem den tesendaktep tajung yanglutsü ajungshia liasü.

Pai ashiba agi, tetsü tebou mapang Naga nungertem lemdanger maliasü, sa kati ka meimtepa kibong ka ama lia

aruogo. Iba dak sendakba nung pai Naga nungertem dang, telongjem aser temaotsü nung alitsü atema asen tetsüteboutemi kechi tajung inyaka toktsüogo iba sülen anidaksü ayongzüka.

Eastern Naga nung rongnung Sangtam nung ya tali tejakdangi or aliba kin ta shia Keoshu-i, Sangtam nungertem dang parnok mapa tajung aser telongjem tanüla ajanga Eastern Naga nungertem len anitsü mepeshia liasü. Paisa, nüburtem dang taruba putu atema asen sobaliba aser libaliro wazüka toktsütsü ajungshia liasü.

Sentong nung Ao Senden tir Marsenen, KTC tir Ngon natia o tatsütsü jembiba aser OTC, Yangli-i ken tajung ka tena liasü.

Sentong nung Phir Ahi, Chimonger, Chungtor, Tronger aser Tsungti Mulung Sinrep yimtsüing nungi tebur cultural troupe temi tsüingsang balala sayua liasü. Ano Kiding, Angangba, Tsaru aser Holongba yimtsüing nungi tetsür cultural troupe temia sobaliba tsüingsa saya.

Maneni tetsürtemi alu apiba aser jenjang menjang aroba yimya sayu aser iba sülen bamboo clamping, Khuling dhe mulitanung, aser Stilt Bamboo Race amala sobaliba asayaba balala asaya liasü.

Sentong nung Convenor Planning Committee, Thsapongchem-i lokti pela agizükba o jembiba aser Pastor, ABC, Longkhim, Toshi Longkumer-i Tsüingrem temaotsü meshizüka sarasadema liasü.

Angh Bhalla-i Onam benjung salem lemsatep

Dimapur, Rongjui/ September 4 (TYO): Nagaland Angh Ajay Kumar Bhalla-i sangdong ka ajanga Malayli nungertem den Onam benjung salem lemsatepogo.

Iba benjung yagi Kerala sobaliba koda takar iba indang sayuba dang masü iba ajanga state telongjem tanüla aser yimjiyimjung sayur.

Onam benjung ya alu kanga

junga aroba atema tenüingsang agütsüba benjung ka dang masü, saka temeim aser telongjem benjungba mapang ka lir, koba nüingtugu Chuba Mahabali-i sayuogo.

Iba benjung amungba mapang ajak nem tepela, yimji yimjung aser anema aliba moajang aser Onam tanüla ajanga asenok ajak tali longjemshidakjang, ta Angh-isa ashi.

Bhikharam Chandmal Northeast-i "Ticket to Hornbill" present asütsü



Theja Meru den Street Smart Advertising ketdangsürtem tangokba noksa nung angur.

Kohima, Rongjui/ September 4 (TYO): Task Force for Music & Arts (TaFMA)-i tanü sangdong ka ajanga, Bhikharam Chandmal Northeast-i "Ticket to Hornbill - India's Biggest Band Battle 2025" present asütsü ta metetdaksüogo, koba taruba Hornbill Music Festival 2025 atema jeli sentong ka asütsü.

Iba sentong tali mera taketba kümdaktsütsü atema Exclusive Sponsorship Partner ama Street Smart Advertising-a densemogo, ta TaFMA mendenbuba Theja Meru-i

metetdaksü.

Theja Meru-i September 4 nü Guwahati nung Street Smart Advertising office semdangogo, kong pai agency ngutetsang den ajurutepa liasü.

Sobaliba benjungtsü, creativity ajungkettsü aser India nung sobaliba sentong tulutiba ka asoshi longjemer inyaktüsü atema nükla kasa aliba iba telongjem ajanga sayur, ta Meru-i ashi.

Mamatoktetsüsa Hornbill benjung tajung ka ayongzütsü onok ajak yongya atar, ta paisa shisem.

ADC Medziphema-i gari senzügenpongtsü tetuyuba agütsü

Dimapur, Rongjui/ September 4 (TYO): ADC Medziphema-i sangdong ka ajanga, nüburtem tekümzüka kübok senzügenpongdahtsütsü atema Khaibung-Zhuikhu tsüingda apu tangsa tang yanglushitsü nüingdaka aliba metetdaksüogo.

Apu kecha tetsükdaktsü makai yanglushitsü aser lendong balala ataloktsü aliba nungi jenboa alitsü atema iba lenmang nung gari senzügenpong nokdanga atatsü nüingdaka kümogo. Anungji nüburtem

kümzüka toktsütsü atema iba apu ya September 5 nungi 24 tashi shibanga atatsü aser iba mapang gari kecha senzütsü memelatsü, ta ADC-isa metetdaksü.

Iba lenmang nung senzürtem dang Moava ajanga Sainik School, Punglwa len nungi Jharnapani aoba lenmang amshitsü metetdaksüogo. Apu meyanglushizük tashi aser tetuyuba tejangja ka magütsü tashi iba tetuyuba ya benoka atatsü, ta kasa sangdong ajanga metetdaksü.

MLA Dr. Rhutso-i...

(TAPAK 1 NUNGI...)

Tang aliba system ya maneni amshitsü asünungbo, creamy layer-i amokbangba nungi kumzütsü asoshi telung nung quotas lemsa nung ajungtsü, ta ashi.

NSSB, NPSC aser departmental recruitment ya 50:50 structure kübok merit nung ajemdaker agitsüla aser sports aser disability quotas ya

maneni balaka amshinung ajungtsü, ta pai ashi.

Paisa backlog vacancy system nunga temelenshi alitsü ayongzüka aser tazüing aliba posts tem par sülen aliba kin nem agütsü nung ajungtsü, aser yamaji inyakba ajanga kasa candidate temi mapa kasa atema maneni metokteptsü, ta ashi.



September 04, 2025 nü New Delhi nung External Affairs Minister S. Jaishankar aser Singapore Ato kilonser, Lawrence Wong na senden amendang tangokba noksa nung angur.

India nung minister tem shilem 47 anemabo ken otem benoka lir: ADR

New Delhi, September 04 (Agencies): Tang India nung minister tem shilem 47-ibo ozüing alema inyakba ken otem parnok anema benoka lir ta sangdongogo; item ken otem rongnung nisung tepsetba, nisung puer aoba aser tetsürtem anema inyakba ken otem densema lir, ta Association for Democratic Reforms (ADR)-i metetdaksü.

Ozüing alema inyakba atema tai tonglokja anogo 30 tashi tepuokdak yura Ato kilonser süaka, Chief Minister tem süaka minister tem süaka menden nungi anentsütsü atema tawa Centre sorkari bill asem benoka liasü.

ADR-i state assemblies 27, Union Territories asem nungi minister tem aser Union Minister tem indang affidavit 643 asadanga iba osang ya renema liasü.

Minister 643 nungjagi minister 302-ibo (shilem 47) ozüing alema inyakba ken o parnok anema benokba

affidavit nung sangdonga lir; aser iba nungjagi minister 174 anemabo ken o tamajung benoka lir, ta ADR-i metetdaksü.

BJP minister tem 336 nungi 136 (shilem 40) anemabo ozüing alema inyakba ken otem benoka lir. Tang state pezü nung Congress sorkar lir aser Congress nungi minister 45 (shilem 74)-i ozüing alema inyakba ken o parnok anema benoka lir ta sangdong.

Minister tem menden nungi anentsütsü atema tawa bill asem benokba mapang nung Union Home Minister, Amit Shah-i, lenirtemi jail nung puoka liaka menden nungi anentsü memelunger, anungji iba ama ozüing ya nüngdak, ta metetdakja liasü.

Regional party tem sasap nung, DMK minister 31 nungi 27 (shilem 87) anema ken o benoka lir, Trinamool Congress minister 40 nungi 13 (shilem 33) anema ken o benoka lir aser Telugu Desam Party minister

23 nungi 22 (shilem 96) anema ken o benoka lir.

Yamaji Aam Aadmi Party minister 16 nungi 11 (shilem 69) anema ken o benoka lir.

Linük level nung Union minister 72 nungi 29 (shilem 40) anema ken o benoka lir.

ADR-i state 11- Andhra Pradesh, Tamil Nadu, Bihar, Odisha, Maharashtra, Karnataka, Punjab, Telangana, Himachal Pradesh, Delhi aser Puducherry assemblies nungbo minister tem shilem 60 dak tema anema ken o benoka lir, ta metetdaksü.

Item denji medemdangra Haryana, Jammu & Kashmir, Nagaland aser Uttarakhand state tem nungbo minister tem anema ken o benoka mali.

ADR-i, affidavits nung shia aliba ken otemji melenshiadoker asütsüa akok, kechiyong 2020 küm nungi 2025 küm tsüingda Election Commission nem agütsüba affidavit nung ajemdaker parnokiba report ya renem, ta metetdaksü.

GST saru ajemba Congress-i pelaa agizüker

New Delhi, September 04 (Agencies): Brihostibarnü Congress party-i, Centre-i küm 8 tashi menor ang GST saru ajemer, ta metetdaksü.

Congress lenir aser taoba mapang Union minister P Chidambaram-i X ajanga, tang aliba sarutem ya mezüing yongi mebenoktsüla liasü, ta ashi.

"GST saru ajemba aser goods & services nung rate ajemba ya pelaa agizüker, ajisüaka iba ya küm 8 tashi menoa liasü. Tang aliba GST aser rates ya mezüingyongi mebenoktsüla liasü," ta Chidambaram-i metetdaksü.

"Onoki tesüiba küm 8 tashi GST inyakyim aser saru anema

ola adoka aruogo, ajisüaka onok ola mangai liasü," ta paisa metetdaksü.

Anogo ka tejaklen Union finance minister, Nirmala Sitharaman-i Goods and Services Tax (GST) saru ajemba sangdong aser saru ajembaji September 22 nungi mapa küma benoktsü. GST rate tasenba kübok chiyungtsü/ osettsüset teimbaka saru shilem 5% aser 18% telatet nung lir, osettsüset aika nung saru magitsü aser karbo 'Sin tax' 40% nung bendenlokogo. Sin tax ya moko aser yi ama chiyungtsütem nung agiba saru lir.

Finance Minister Nirmala

Sitharaman-i, "Sensakertem aser middle class nisungtem atema saru shilem 18 aser shilem 12 aliba nungi shilem 5 tashi aluogo. Kou totzü, sapon, shampoo, toothbrush, toothpaste, bicycles, joka nung amshiba osettsüset aser kidang amshiba osettsüset aika nung tangbo saru shilem 5 dang agitsü," ta metetdakja liasü.

Bodhbarnü 56buba Goods and Services Tax (GST) Council senden mena osettsüset aika nung saru ajemba reprangshia liasü. Bodhbarnü GST Council sendenji ghonda 10 ser tesadang mena Centre aser state sorkartemi o lemtepa liasü.



September 04, 2025 nü A m r i t s a r district kübok Ramdas nung tzü metsünga aliba kiyong ka nung kibong kati ki toktsür aotsü lia t a n g o k b a noksa nung angur.

Jharkhand nung Maoists den khatepdang sepai ana asü

New Delhi, September 04 (Agencies): Brihostibarnü Jharkhand state kübok Palamu district nung CPI (Maoists) nungi jakzükbä telok Tritya Sammelan Prastuti Committee (TSPC) den khatepdang security sepai ana asü aser ka yiruogo.

Anüingdang 12:30 ako meta Kedal yim anasa sepaitem aser telungpurtem tsüingda khatep tenzüka liasü, ta Palamu Deputy Inspector General of Police (DIG) Naushad Alam-i metetdaksü. Iba rara nung sepai ana-Santan Mehta aser Sunil Ram na asü aser ka yirua Medinirai Medical College & Hospital nung yaridar.

Palamu Superintendent of

Police, Reeshma Ramesan-i, iba tesem nungji TSPC commander Shashikant Ganjhu den pai aniba züingsemtem lir, ta osang angazükba sülen sepaitemi iba yimji mita ao; yim tonga aoba mapang nung TSPC züingsemtemi tama injang khalokja liasü aser iba rara nung sepai asem injang agi yiru, ta metetdaksü.

Sepaitemji Medinirai Medical College & Hospital-i anir ao saka anabo meküzmzükteti asü aser tanüingba police kaji treatment agidar, ta lai metetdaksü.

Mapang tatsüka khatepba sülen Maoists telungpurtemji jena otet, saka sepaitemi maneni telungpurtemji mita odar, ta laisa metetdaksü.

Ato kilonser Modi-i Singapore Ato kilonser Wong den senden amen



September 04, 2025 nü New Delhi nung Ato kilonser Narendra Modi aser Singapore Ato kilonser Lawrence Wong nati külem sangdong ka agütsüadang tangokba noksa nung angur.

New Delhi, Rongjui/September 04 (Agencies): Brihostibarnü New Delhi nung aliba Hyderabad House nung Ato kilonser, Narendra Modi-i Singapore Ato kilonser, Lawrence Wong den senden menogo.

Senden nungji Ato kilonser Modi-i kiralongrartemi Pahalgam amakba sülen Singapore sorkari India den mangyim jashi lemsatepba atema pelaba metetdaksü.

Senden tembangbba sülen osangbenertem den jembidang Modi-i, "Kiralongra atema linük anapronglai kasa tebilemtsü akar. Linüktemi longjemer kiralongra anema raratsüla. Kiralongrartemi Pahalgam amakba sülen India nungertem den mangyim lemsatepba aser kiralongra anema raraba nung asenok pusemba atema ni Ato kilonser Wang aser Singapore sorkar dang pelaba lemsateper," ta metetdaksü.

India aser Singapore na tsüingda tesendaktep yangluba sülen küm 60 ajungba mapang nung Wong-i India sendanger. Wong-i external affairs minister S Jaishankar, finance minister Nirmala Sitharaman aser BJP national Tir, JP Nadda nungera ajuruogo.

External affairs minister S Jaishankar-i X ajanga, pai New Delhi nung Singapore Ato kilonser Wong ajuruogo aser linük ana tesendaktep tashi itshitsü atema pai maneni ajungshiba atema pa dang pelar, ta metetdaksü.

Modi-i, Singapore ya Southeast Asia nungbo India atema shishilembaba partner tulutiba lir aser Singapore ya

India indang Act East Policy tongti tongshi ka lir, ta ashi.

Lenir anati kulisüa PSA International's Mumbai Container Terminal tanabuba shilem semzüker aser linük anati green & digital shipping corridors nung amalitepa inyaktsü sangdong.

Singapore aser India natasa space tsütsü amalitepa inyaktsü bangjem aser manufacturing, skilling aser digital technologies sectors nunga amalitepa inyaktsü.

Modi-i, India nunger bank tasen 13 UPI-PayNow cross-border payments system nung denogo aser taruba India-Singapore Hackathon taküm küm tatemlen agitsü, ta ashi.

Modi aser Wong nati mapang shia Bilateral Comprehensive Economic Cooperation Agreement (CECA) asadangtsü aser India-i ASEAN den angati shishilembaba tenangzükbä agitsü bangjemogo; ibaji ajanga shishilembaba aser investment jenjang tajungba akümtsü.

Wong-i India den space tsütsü amalitepa inyaktsü atema tezüingzüktep tasen ka agiba metetdaksü. Paisa, Singapore-made satellites 20 bo India nungi khakettsüogo, ta ashi.

Wong-i, linük ana tsüingda tesendaktep tamendakdakji nüburtem tsüingda tesendaktep lir, aser maneni civil service training densema lenla balala nung amalitepsü, ta ashi.

Bodhbarnü Wong aser pa kinüingtsü, Loo Tze Lui nati New Delhi nung Rajghat semdanga Mahatma Gandhi nem akhüm agüja liasü.



TIR YIMYIM YIMOBILEM (EDITORIAL)

DIMAPUR FRIDAY, SEPTEMBER (RONGJUI) 05, 2025

Tang ya Covid wara aru nungbo !

Tang ya Nagaland government-i Covid-19 mapang mibang nung arangokja 'contract' nung anioker doctor aser health worker-tem parnok 280 tashi regularize sütsüsü lemtetba anema medical zünger mapa mangurtemi nokdakba mapang lir aser medical zünger mapa mangurtemi nokdakba kuliji pusema lokti tentettem karibo ola agütsüogo. Atangji, tang ama Nagaland nung zünger mapa manguba mapang, Health & Family Welfare department ama nung zünger mapa bushirtem nem merangdangtsü maongka kenyongi magütsüi, lendongbang nung süaka, khen atema 'contract' nung shimba nisung noklang ana asem tashi khen nung 'regularise' sütsüsübaji zünger mapa bushirtem asoshi government mapa angutsüba lenmang shibanga yutsür asütsü aser ano külen, ashiko, lendong asünungji kecha mashishii shimertem rongnungjia metemsüba purtema alitsüa akok, anungji shiranger yariba mapa nungbo temsü-metemsü ta asüba maparenjia mamatsüla. Aji oda, mapa ajak nung rongnung nisung ka taküm o tasü na bendangtsüsübaji doctor aser nurse-tem mapa ya lir, anungji shiba shimdir shimang, junga zünga ashiba aser temsüa aliba nisung ka asütsüla. Tetezüji, lendong mapanga sang mesüra lendong maliba mapanga sang, shiranger anepalutsüba mapa nung yabo jungjunga tendanger külen dang inyakertemji shimtsüla. Ajisüaka, taoba Covid-19 mapang Nagaland nung government mozü kidang inyaker agi mabensa asü, anungji lendongbang nung aritepa tatidanga magi ser doctor aser health worker-tem aika shimok aser parnok mapaji regular kümtsüsü teimla dena government-i agütsür alitsü südi. Atangji, asenok aikati Covid-19 mapang tsüraburtem o tanurtem na ajuruteptsüa koda tetsübutsüka liasü, aji ajangshigo. Aji oda, mozü kidang anepalutsü asoshi ayuyonga mozü kidang inyakertem dena shiranger tonga aotsü tsübur asünungji, shirangertem yarir mali, chiyongtsü aser mozüa peisasa bener oa achitsü atema tesem ka nung yutsür oli ta inyaka aruba mapangtema liasü. Aji oda, talisa bendanglen azünger aser mapa inyaker chirnur aser lanurtem pei alidak nungi train nung arutsü aser parnokji kinungertem dena majurutepdaktsüi train station nungi bus nung 'quarantine center' bushia oa yangji toktsüli ta asüba mapang, mozü kidang inyakertem dena quarantine center nung alirtem anepalutsü asoshi arendaka bilemba anogotema liasü. Iba ama mapang nung Covid wara agi asütsü tsübuba agi mozü kidang inyakertema karbo mapa nungi anenba osanga liasü. Aji oda, quarantine center-bo lapoka ayu saka yangji alirtem asoshi souchioka bener otsür mali tsübutepba maanga ajurua aruogo. Iba ama tasütsü wara tsübutepba mapang nung, temulung ashitsüka, tasürtem aremer-a mali, funeral agitsür a mali, jcb (excavator) agidang ali tur yangji tenünga mezülu ser mashi nung rema toktsüba mapang tamajung kaji Covid mapang liasü. Atangji, iba ama lendong mapang, tasüa majem nisung aikati temeim mapa inyakogo saka nisung aika asoshi Peteri Yisu menanzüktetba mapang mesüka ka liasü. Item mapang aser anogotem indang bilemdang dang, tang ya ano khen Covid mesüka tashidak wara tesashi ka aru nunga asenoka koma süla (?) ta bilemer. Aji oda, tang pulpit nungi tetsübu tanela medeni temeim mapa inyaktsü jembirtemi komaka inyakla ? Aser tang mozü kidang teinyakdak pur aser ano mozü kidang inyaktsü mapa bushirtemia komaka inyakla (?) ta kanga shisabolua bilemer. Akhi nung yimten aser lokti nung pei taküma dena bendanga agütsüsü amato jembirtem to Covid tsübu agi kimai madok aser Tsüngrem dak amangertem mangyim jashi lemsateptsü memulung aser putirtemi asüpila sentep agitsü tonga moutet 'online' nungang sarasademer toktsü. Iba ama tetsübutsü mapang, shiranger anepalutsü shimertemji parnok tazünga kuliji dang shitak lira, tangar den memeyoktepi parnok temsü –metemsüji tendanger 'regular' kümtsüsübaji parnok mapa dak langa lir. Atangji, iba jagi medical zünger mapa mengui alirtema makoksatsüsa government-i sentong ka renemtetsüla.

OLEMSABANG ASENOKI ALU MERANGA AYIMTSÜ TENZÜKDI

~ L. Kika Pongener.

Asen Ao kin ya tsürabur mapang nungi alu meranga yimer küm nungi küm renteta tepok sunga chiyunga-jema lia aruba kin lir. Alu meranga ayimba agi tangar dak memetaloki chiyunga-jema lia aruba chirtem aser semchirtem asenok lir. Ano karbo alu meranga ayimba kisung agi takar kümer 'Su chia' yimer nem shijok-tuja, yimpoksu agüja chiyungdaktsüba aser maka-maiter nema tsükdem agüja chiyungdakja lia aruba kin lir. Akhi putu nung 'Putu Menden' nung yimsusur tata-tainertemjia teimba ka tsük-jen ana-asem sunga tokoka yur shinga daka memetaloki chiyunga-jema yimsusua aruba kin lir. Akhidang asen tsüraburtem jang-otsü nungi shir moko-mersu, aonsotsü ajunga pei lu nungi parnok peribo züsenteta chiyunga-jema aru. Anungji tzüma lima nung metsü aser sungo, itemla kar aliba dak alaka kecha tebilemtsü makai lia aru. Ajisuaka, tanü asenok tia asadanga reprangdangra, Assam lima Amguri aser Mariani nung jangpong yur alir teimba lir. Assam nungeri ita pongu-terok ka mesenzüdaktsüi lenmang shibang nungbo asen Naga nungerbo aya agi sumatsüba jenjang nung teimba lir. Asenoki asenok lia aruba jenjang ya khen jungjunga shisadanga, oboula-bo sujak/langdem demer tola masem (Half Naked) ser aluyima liasü, ano obala tia ka-a Yisu yimsu agizükba agi 'Ponin Tola' semer Patalong (Half Pant) semer aluyima lia aru, aser item chirtem aser semchirtemji tanü asenok lir. Ajisuaka, tanü asenok libaliroba jenjang ya akhi putu den medemdangra, 'Snake Game' nung number ka nungi khenyongi noklang (1-100) jenjangi kaketa atuba amai lir.


Asenoki India lima talang kati moi asen anasa aliba Assamese nunger ya reprangdangra, parnok-bo Century ana-asem agi asenok dang nungi kanga agi tamasa nuji akümba kin lir. Atangji, par tetsü-tebou nunger Century ana-asem tashi nuji kümer takarsa lia aruba chirtem aser semchirtem lir. Aji oda, parnok iba jenjang nungji liaka parnok libaliro balaka 'Standard' nung aliba asenoki mangur. Parnok libaliro, chia-ajemba, subosolemtsü, jembi-shinu yimya ajak nung balaka temelenshiba mali ajak den küsasa liromedema liteter. Parnokbo kechi kodakirnaka takar akümyongjia akhidang achiba chiyungtsü, akhidang agiba aben-suoshi to-sa agir. Ajisuaka, asen Naga nungerbo tera kaa-ita kümra khenyongi libaliro jenjang balaka melenshir aser tangar tenuki mongui kangasa ulua akümer. Asen Naga nungerbo yashi tashi tangar kidang teka laadaker meshimetsüa lia aliba; kecha meimlai-ka maongka ka agi Election-i yir tia kaa atoker MLA/Minister kümra....Yashi tashi tangar kidang meshimetsüa aliba-to amaatokar....Spoon aser Fork dang amshia chiyungtsü....Aserbo ano taruba Election nungbo matokra....Ano akhi jenjang-to agisa sepzüka alutsü. Anungji tzümar o asenok naji kechisarena nung kecha apiteptsüla masü, saka parnok libaliroba den medemdangra asenok libaliroba ya kangasa taaktsüka lir.

Tanü asenoki asen Naga nunger tia reprangdangra alu ayimba kisung dak nendaker lia aruba chirtem aser semchirtem-to tanübo aluyimer aika mali küma-adok. Talisa, tangar kinji-bo khen oda toktsür asen Aor yimdak yimtsüng nung alirtem aika aluyimer mali kümamadokogo. Yimtsüng aika nung alu puok aika arem min küma tawa yua lir. Surabangla, alu mayim ser iba melena tanga mapa tajungba ka tepok sunga chiyunga-jema litettsüsa makara kechi koda kibong taküm mesua alitsü...??? Hau, oda ita sen tila-ka asüyunga ngua chia-jema alirtem sura ajia kecha masü...Saka mapa kecha maka ser yimdak alirtem alu mayim koda kibong mesua alitsü....??? Manganutsü mali, tanü asen Aor yimdaklir-tem teimba ka pei adianu, pei chirnur jila nung alir aser takar-tulurtem dak nendaker alir teimba lir. Aji oda, jila nung alirtem teimba ka itasen tila ka agi jabaso-jala Private School & College nung züngdaktsür, ariana pei kibong khuret mekoksumongi alir teimba, saka ano yimdak alir tsürabur aser adianu dena arepba agi arok apangteper telungi aluba kibong aika lir. Hau, kati ka den yaritepa alitsübaji sobaliba tajung lir, saka ajak nungbo kinunger adianu daka asüyongjia nendaker malitsüla, akokba tashi pei akokba mapabo meranga inyaktsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

October 9 nü Korea nung Men's Ministry conference agitsü



MIM Korea Director, Rev. Lee Byung-il-i teburtem ministry atema kaket 'My Journey' sayuba noksa nung angur.

September 04, 2025: United States nung amenoka aliba Christian men's discipleship movement-i tang mezüing October 9 nü South Korea nung conference tuluka ayongzüka agitsü.

Arogotem, kibongtem aser loktililiba atema iba conference ya kanga tongtibang asütsü, ta sentong ayongertemi metetdaksü.

Man in the Mirror (MIM) Korea-i South Korea yimtiba, Seoul nung aliba Younknak Presbyterian Church nung iba sentong ayongzüka agitsü. Iba conference nung teburtem ministry, nütsüingsütsü atema asalentong aser Asia nung ministry mapa takok anguba onüktem nung o lemteptsü.

Iba conference nung o jembirtemji MIM Korea Director Rev. Lee Byung-il, US nung MIM Tir Brett Clemmer, ACTS University nungi Prof. Jeon Byung-cheol aser MIM Asia Director, Robert Lim nunger asütsü.

1986 küm Florida nung businessman, Patrick Morley-i Man in the Mirror (MIM) tenteta liasü. MIM nüngja ya pai züluba kaket kasa nüngja lir. Iba kaket nungji Khristan teburtem atema Laishiba tsütsülen nungi tayongzükbä 24 metetdakja lir.

MIM tenzükbä mapang nungi ministry-i teburtem tanela jenjang asüngsashitsü, tesendaktep yanglutsü aser small-group discipleship ajanga tebilemtsü onük balala koktettsü atema rangloker inyaker.

MIM Korea nung lenirtemi ashiba agi, parnok nükjidongji Arogo nung Khrista sülen chichia anidakertem anitettsü aser kidang-kibong nunga tamang jenjang tashi itta alitsü atema lir.

Osangbener den jembidang Rev. Lee-i, tanü putu nung teburtem aikati tanela jenjang aser tensa mapang na liromedema alitsü atema timtem ajangshir, ta ashi.

Paisa, "Teburtemi pei kidang,

Tenla kidang aser loktiliba ajak nung Tsüngrem memetetra tarutsü putu aser Korean Arogo nung tapok tulu apatsü," ta ashi.

Pai ashiba agi, Korean Arogotem nung pastor tem aser putirtem teimbaka teburtem lir, ajisüaka intentional ministry nungbo teburtem kanga ajema lir.

"Korean Arogoi ministry nung teburtem kanga tongtibang ta memetet," ta pai ashi.

MIM Korea-i ashiba agi, taruba conference ya item metokmeperi atema jembitsü aser Arogotem nem practical tools agütsütsü atema lir.

Taruba conference nung Korea nung teburtem nütsüingsüba aser alima tensa mapang asadangtsü, iba dak alia teburtem ministry ajanga US aser Southeast Asia nung Arogotem aser loktiliba kongshiba indang jembitsü.

Iba conference nungsa Korean Arogo atema renemba nütsüingsüba asalentong indang research agiba osang metetdaksütsü.

Iba conference tembanga o lemtepbä sentong agitsü aser iba sentong nungji Clemmer, Jeon, Lim aser Lee nungeri shilem agitsü. Iba dak alia pastor tem aser Arogo lenirtemia item asalentong dak sendakba nung tasüngdangba balala asüngdangtsü atema maongka agütsütsü.

Lee-i, "Iba ya sentong ka dang masü. Kodang teburtem melenshidir kibongtem yangershitsü, Arogotem asentenshitsü aser linük den alima tenzüksü atema tashi agütsütsü," ta ashi.

MIM Korea-i iba conference atema renemba tongti omen rongnung kaji 'kidang tanela lenir ka ama tebutem teinyaktsü shilem' lir.

Osangbener den jembidang Jin-young Kim-i, "Tanurtemi Khrista osangtajung nungi pilabaji tebutemi Khrista tiyongtsü südaktsüba taküm lia mesayuba agi lir. Tebutem aikati

Tenla kidang balaka aser pei kidang balaka alir," ta ashi.

Kim-isa, "Arogo aser kibongtem nung temelenshiji piladaktsütsü makok. Tebutemi pei kibongtem nung putir ka ama maliba agi kibongtem nung temelenshi madoker, aser ibaji ajanga loktiliba nunga temelenshi madoker. Kodang tebu kati pei kidang putir ka amai lidir kibong rangbenji Arogo nung züngsem tajung kaka asütsü," ta ashi.

MIM-i telok balala lemsar pei taküm jenjang reprangshitsü atema ajungshir. Item telok tila atema tongti leniba kaketji tawa Korea oshi nunga meyipzükbä 'My Journey' kaket lir.

My Journey kaket ya Morley-i zülü. Iba kaket nung sarasademba, tekülem agiba aser Lai bushiba lenlatem nungi tesayuba aika agüja lir. Iba kaket nungsa kiyimba, tsürabur ka teinyaktsü shilem, senotsü ketdangtsüba, tetsübu, ain adokba aser tatidang ajuruba onüktem nung tesayuba agüja lir.

Teburtem dang iba kaket zünga pei taküm jenjang asadangtsü ajungshir aser tanela nung aintsü atema kati ka ajungshiteptsü ayongzüker.

Lee-isa, My Journey nung keta alibatemji conference nunga lemsateptsü, kechiyong ibaji ajanga pastor tem aser Arogo nung lenirtemia peipei Arogo nung benshitsü atema aika angazüktsü, ta metetdaksü.

Iba conference ayongzükertemi, iba sentong agiba ajanga Men's discipleship ministries tenzüksü atema Arogotem ajungshitsü imlar, ta ashi.

MIM Korea-i iba conference tembangba sülen ministry teams ajanga maneni Arogotem nungita teburtem nem training agütsütsü.

Lee-i, "Onok mission ji Arogotem nung tebur shiaji chichiba Khrista nütsüing kaka kümdaktsütsü atema lir," ta metetdaksü.

ANOGO ABEN TSÜNGREM DEN

Tesama Tulutiba
T. Ken 51:11

Tejashi ajakji temenentem nungi adoker, saka tesama tulutibaji Kibuba den tesendaktep raksabaji lir. Dawid sarasadem nung kecha tesüngmangtsü mali, "Ne tsüngdang nungi ni teindok; aser ne Tanela temeshi kü dak nungi tagien" (t.11). Dawidi pa jakdang aliba, Saul dak kechi atalok bilemteta liasü. Sauli Kibuba anema apuso. Anungji Tsüngremi pa Tanela Saul dak nungi agien aser Dawid nem agütsü.

Tanü Tsüngremi Pa Tanela asenok nungi magiener. Yisui Pa nütsüngtem dang ashi Tsüngrem Tanela parnok den teti alitsü asoshi arutsü. Kodang na temulung meyipdir Tanela Temeshi ne dangi arutsü aser pai ne tekümtet asoshi temaitsü (seal) ajentsü. Na Tsüngrem Chir ta pa kuli aser na Khrista meyong ta pai jangjatsür. Saka nai kodang Kibuba anema temenen menadir, asenoki Tanela temeshi den tesendaktep, temoatsü apuokdak raksar. Khristan taküm nung kechisarena ajak Kibuba den telungjem nung sendaka lir. Dawidi teti Tsüngrem dena aliba nung mataloker ali, züludang, mesüra army anishidang pai Tsüngrem dak metalok. Anungji Tanela Temeshi adenba tashi samatsü pai teti tzüraseta liasü.

Tasen Lai nung Kibuba adenba dangji telungjem ta aja. Techir akümba aser telungjem anaji oset balala lir. Techir akümbaji asenoki Yisu Khrista dak amangba tamang ajanga akümer- asenok Tsüngremer kibong nung asor. Telungjemji asenok Pa den tamang katetta aliba ajanga adoker. Asenoki asen taküm merüka ayur. Asenok Pa dang tashi angar. Sarasadem ajanga asenoki Pa den jembir. Aser Pai asenok den Pa o nung jembir. Temenen menaba ajanga ibai tesama.

Tsüngrem den telungjem jenjang (condition) nung lir. Asenoki asen taküm nung temenen menara, asenoki Pa den telungjem mekatettsü. Nai anogo shia Kibuba den jajatsü bilemdar ma? Nai bilema melira, tsükchir ne taküm nung jenjang yanglutsü. Temenen temena, Tsüngrem O ji tashi angang aser Pa den sarasadem mapang yuang. Kibuba den jajatsübaji mezüngbuba südakjang.

Tang mezüing 'print' dang nungibo 'digital' Laishiba teimba lemogo

September 03, 2025: Tang nung Laishiba million 4 aser mezüing Laishiba menünga English oshi nung Laishiba 3.2 alemba dang nungibo digital menüngogo.

Laishiba alemba teimba 2024 küm Bible apps nung Laishiba tekong billion 28.3 kümogo, ta United Bible Societies Fellowship (UBS)-i reprangogo aser audio ajanga metetdaksü. Laishiba tekong billion 1.3 angaogo. Tang alima nung digital kanga bulua amshitepbä mapang nung nisung aikati Bible apps download asür.

UBS indang Scripture Distribution Statistics report ajanga ashiba agi, 2023 küm alima nung Laishiba million 24.2 lema liasü saka 2024 küm nungbo million 22.5 shi dang alem.

Ajisüaka online Bible bo (digital Laishibabo) million 25.9 lemshiego. Iba tetezü tang mezüing print Laishiba dang nungibo digital Laishiba teimba lemsatepogo.

Ano print Laishiba teimba anguba linükji Brazil liasü (million 4.2), iba sülen India (million 1.8) aser China (million 1.6) na liasü.

2024 küm print asüba Laishiba shilem 50 shibo oshi asem indang Laishiba liasü. Spanish oshi nung Laishiba million 4.5, Portuguese oshi

Paisa, "Nisung ajaki pei oshi nung Tsüngrem O züngtettsüsa Temeshi Laishiba agütsütsüji asenok teinyaktsü mapa lir," ta ashi.

Tesüiba küm 10 tsüngda UBS-i Laishiba billion 2.6 menüngogo; aser item Laishiba nungji Tasen Lai million 102.3 menüngba densema lir.

AO OSHI ANGAZÜKDAK:

TANÜ ANGAZÜKTSÜBA OJANG



Tetlateshi

(adv) tangari tenüng tetshia jembitsüba (speak ill of others by name)

* Asenok ajak tangar nem tetlateshi mesüdahtsüsüsa alitsüla.

Tetoktak

(n) mit melamelaa atokba, taremtük maka(intolerant, short tempered)

* Tetoktak nisung lokti nung lenir mesüdahtsür.

OLONG PAITEP # 7261

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti - (5)
4. Tsük rudenba - (5)
6. Temzüng tesashi - (5)
8. S _ _ _ i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 7260 TELANGZÜBA

TIPIEN :

1. Tanga, 6. Wara, 7. Rajang,
9. Anük, 10. Jenjang, 11. Alar,
14. Ngashi, 15. Nala, 16. Mechi.

LANGTSÜNGLEN :

2. Anga, 3. Yabang, 4. Tarok,
5. Orak, 8. Ainer, 9. Anema,
10. Jabili, 11. Among, 12. Miim,
13. Anem.

Aug 2025 nung India nung Toyota gari 34,236 ayok

Bengaluru, September 4, 2025 (Agencies): August 2025 nung Toyota Kirloskar Motor (TKM) gari 34,236 tashi yoktetogo aser iba ya küm ka nung 11% inlokba lir.

Yaküm August ita TKM gari 30,879 yokteta liasü. Iba ajanga Indian market nung Japanese nung gari company jenjang meraksai aruba sayur.

July 2025 nung Toyota gari 32,575 yokteta liasü aser ibaji August ita den medemdangra 5.1% inlokba lir.

Taküm August nung ayokba garitemji domestic market nung 29,302 aser tangalen 4,934 (export) lir.

Taküm küm tenzüker ita 8 tsünga Toyota-i gari 2,41,696 yoktetogo. Yaküm kasa mapang tsünga gari 2,12,785 yokteta liasü.

Gari yokdokba rongnung Toyota Innova series, talisa Innova HyCross kanga ayoker. Toyota-i India nung Innova brand sayaba sülen August 2025 nung küm 20 abensaogo aser Innova gari amshiba customers lakh 12 tema lir.

Tang ya Innova Crysta dang nungi Innova HyCross teimba ayoker aser Innova garitem ayokba nung 61% ji HyCross ayokba lir.

July 2025 nung Innova sales

(HyCross & Crysta) 9,119 units yoktetogo aser iba ajanga Urban Cruiser Hyryder aser Glanza garitem jakdang Innova ya best-selling model lir.

Overview of TKM : Equity participation Toyota Motor Corporation (Japan): 89%, Kirloskar Systems Limited (India) : 11% Number of employees: Over 6,500

Land area : Approx. 432 acres (approx.1,700,000m2)

Building area : 74,000 m2

Total Installed Production capacity: Up to 3,42,000 units

Overview of TKM 1st Plant:

Established: October 1997 (start of production: December 1999)

Location: Bidadi : Products: Innova HyCross, Innova Crysta, Fortuner, Legender manufactured in India.

Installed Production capacity: Up to 1,32,000 units

Overview of TKM 2nd Plant: Start of Production: December 2010

Location: On the site of Toyota Kirloskar Motor Private Limited, Bidadi

Products: Camry Hybrid, Urban Cruiser Hyryder, Hilux

Installed Production capacity: Up to 2,10,000 units.

North East terenlok atema NEC-i sen crore 12.18 lemtütsü

Imphal, Rongjui/September 4 (Agencies): Ministry of the North Eastern Council (NEC)-i Brehostibarnü sangdong ka ajanga, Mizoram, Nagaland, Meghalaya, aser Manipur densema North East kübok tesem balala nung terenlok maparen balala asoshi sen crore 12.18 lemtütsüba sangdongogo.

Iba sen ya iba tesem nung aluyimba, shiruru metsüba, shisaluyim, skill development aser libaliro jenjang tajungba kümdaktsütsü nükjidong nung lemtütsüogo.

NEC-i inyakyim balala atema senotsü lemtütsüogo. Tongtibang inyakyimtem rongnung Scientific Smoked Meat Production unit tem atema sen crore 2.33, Scientific Pig

Breeding Units, Phase-III atema sen crore 2.93, Manipur aser Meghalaya na nung ango aser ak metsüba ajungketa Multi-Agriculture Project ka atema sen crore 1.24, Manipur kübok Imphal West, Thoubal, aser Bishnupur district tem nung piggery value chain ka amenoktsü atema sen lakh 54.18 lemtütsüba densema lir.

Council-isa, avocado alu ayimtsü atema sen lakh 50.42 aser nodal institute ka ama Indian Institute of Entrepreneurship (IIE) amenoktsü atema sen crore 2.07 lemtütsüogo.

Iba den bendenloksema NEC Merit Scholarships atema sen lakh 8.55 agizüka yuogo aser Manipur aser Nagaland na nung Multi-Agriculture allied

asur piggery promotion project tem atema sen crore 1.08 aser crore 1.10 lemtütsüogo.

Ano, Empowering Voice in North East India ta nüngja agütsür ethical journalism dak sendakba nung national conference ka atema sen lakh 8, Mizoram (Phase-II) nung Financial Inclusion Workshop ka atema sen lakh 10 aser Government Achievement Expo 2025 atema sen lakh 9.95 lemtütsüogo.

NEC ketdangsür kati ashiba agi, North Eastern state tem nung sustainable development tashi tatitba kümdaktsütsü, libaliro tajungba kümdaktsütsü aser skill development jenjang ajungkettsü atema tasa balala asar inyakyonga aoba nung iba ya-a shilem ka lir.

Assam: Taoba MLA anati BJP & AGP party toktsü

Guwahati, Rongjui/September 4 (Agencies): Taruba küm Assam nung Assembly election agitsü lia taoba mapang MLA anati Bodhbarnü pei party toktsüogo.

Taoba mapang Sipajhar nungi BJP MLA Binanda Saikia-i party toktsü aser taoba mapang Asom Gana Parishad (AGP) MLA Satyabrata Kalita-ia party toktsüogo, shirnok state nung BJP den sendaktepa lir.

Osang ajanga ashiba agi, Saikia ya Congress nung adentsü aser Kalita ya Assam Jatiya Parishad (AJP) nung adentsü akok.

Saikia, shiba 2015 küm BJP nung aden, pai 2021 küm nungi party dak sendakba ken o tem nung pa dang kecha tongteratep

masüba atema mepelaba lemsatepogo.

"Communalisation indar aser party ya jurila atema inyakba ka dang kümogo. Party nung longiemer inyaktsü kecha nükla mali," ta pai osangbenertem dang ashi.

Saikia-isa, pa Chief Minister Himanta Biswa Sarma kecha mangatettep mali ta shiogo. Ajisüaka pai tang tashi tarutsü atema telemteba ka agia mali.

Kasa mapang nung Kalita-i Bodhbarnü osangbenertem den sensaksemba mapang BJP nem anishidaktsüba atema AGP lenirtem aija liasü.

"Ni iba ya anema aruogo. Iba yagi party tarutsü kanga mejungi kümdaktsütsü. AGP ya BJP indang Morcha (unit) ka

kümdaktsüogo. AGP ya BJP indang regional unit ka kümogo," ta pai ashi.

Kalita-isa, Centre-i Citizenship (Amendment) Act (CAA) kübok cut-off date ya December 31, 2024 kümtsüba aitsüogo.

Pai, 1985 Accord kümzüka meyutetba atema AGP tir aser Assam Accord minister Atul Bora aitsüogo.

Iba accord nung March 24, 1971 sülen Assam-i aruba bendangertem ajak meyipa yoktsü ta shia lir. Kalita-isa, AGP pur yongsü nung democracy kecha mali, ta ashi.

Kaliat-i, pa 2026 küm Kamalpur menden nungi tokteptsü ta shiogo. Iba menden ya taoba election nung BJP-i koka liasü.

Mizoram: Dampa bypoll atema MNF-i R Lalthangliana shim

Aizawl, Rongjui/September 4 (Agencies): Mizo National Front (MNF)-i Dampa by-election nung tokteptsü atema party nungi taoba mapang minister aser senior vice president R. Lalthangliana (69) shimogo.

MLA tinyakdak Lalrintluanga Sailo asüba sülen iba constituency atema by-election agitsü sangdonga liasü.

Züngsem 40 agi kümtetba House nung Opposition party-i menden 10 koka lir, aser parnok

atema iba bypoll ya kanga tongtibang asütsü.

Dampa menden makokba ajanga party-i House nung Opposition indang lenir mapa bena aliba jenjang ya samatoktsü.

Sorkar kümteter aliba Zoram People's Movement (ZPM)-i nüngtugu osang tajung kentener aser sayutsüingir arishi küm 46 tain Vanlalsailova parnok indang candidate asütsü shimogo.

Vanlalsailova ya yimden yimsüsüba nung tangang tasen

lir, saka pai 2023 küm election nung tera agi dang tamakok angu. Pai vote 292 agi dang Lalrintluanga Sailo makok.

Ajisüaka iba tongtibang by-election atema Congress aser BJP nati tang tashi candidate sangdonga mali.

Mizoram Pradesh Congress Committee aser State BJP nati candidate sangdonga mali aser kasa mapang nung People's Conference pur election nung tokteptsü metokteptsü tang asadangdar.



Guwahati: Assam nung Udalguri district kübok Suklai nungi Rupa Nirola-i, 12th Miss and Mr Deaf India tetokteptba nung Miss Deaf India 2025 naroküm agizüka state nem konang tetushi bener arutsüogo. Iba sentong ya Punjab nung August 30 nungi September 1 tashi agia liasü. Rupa ya Dharma Nirola aser asür Nirola na jala lir aser la tang North East Degree College nung azünger.

Trump-i Supreme Court dang tariffs ken o nung obendang melenshitsü ashi

Washington, Rongjui/September 04 (Agencies): Bodhbarnü Trump administration-i Supreme Court dang federal law kübok import taxes meshitsü tir dak tashi lir ta tekeraba nung obendang agütsütsü ashi.

Tir Donald Trump-i tariffs meshiba ya timba emergency powers law ozüing alema amshiba lir ta appeals court kati obendang agüja aliba melenshijang ta sorkari court dang ashi.

Trump administration ajanga Supreme Court dang iba ama temepishiba aika agüja aliba nung ibai tesüsaba alitsü aser obendanger matsüngdang tir indang trade policy ken o ya tiyong südaktsütsü imlar.

U.S. Court of Appeals for the Federal Circuit ajanga tariffs ya tang atema melar, saka administration-i high court dang tekeraba nung teka amuoktsü ayongzüka electronic yimya nung Bodhbarnü menur petition agütsü. Iba ken o ya Brehostibarnü benoktsü imlar.

Solicitor General D. John Sauer-i obendanger tem dang iba ken o ya November ita tetenzüklen benoka jembitsü asüngdang.

"Iba telemtetba ya ajanga Tiri tesüiba ita pongu tashi tariffs ajanga bendanger den

jembishinüa aruba nung timtem agütsür, tang jembir aliba aser tejembidak aliba framework deals raksatsür," ta pai zülü.

Businesses temi anaben takok nguogo, khien federal court ka nung shishilempaba dak rangloker aser ano appeals court ajanga 7-4 obendang agütsüba lir.

Tariffs ajungbena bebnoka alima nung markets anokshija US trading partner aser tembar linüktem samaja osettsüset nung sen timba akumtsü aser rongsenketzüng meilongi aintsü tetsübo mechi ken o aika benokba rongnung parnok indang lawsuit ya ka lir.

Ajisüaka Trump-i trade deals tasen agizükdaktsütsü mechi European Union, Japan aser danga linüktem nung iba tariffs ya amshi. August ita tatem tashinung tariffs nungi revenue sen \$159 billion junga aru, koba taoba küm kasa mapang aruba dang anaben agi timba lir.

1977 International Emergency Economic Powers Act, mesüra IEEPA yagi Trump-i tariffs yanglutsü atema congressional powers amshitsü memelar ta US Court of Appeals for the Federal Circuit nung obendanger timbai angatet. Ajisüaka iba obendang magizükteter temibo iba ozüing

yagi emergency mapang talenba makai bendang lima nungi osettsüset bener aruba azüoktsü tir nem tashi agütsür ta ashir.

Obendang nungya import taxes tabu ana dena lir, aser anaprong ya national emergency ka lir ta Trump-i sangdong - mezüngbuba April ita sangdong aser tanabuba ya Canada, China aser Mexico nungi bener aruba osettsüset nung February ita nungi meshiba taxes alitsü.

Constitution ajanga tariffs densema taxes meshitsü Congress nem tashi agütsür. Saka küm aika ozüing yanglur temi iba tashi ya tir nem agütsü aser Trump-i iba tashi ya timtiba amshi.

Bendang lima nungi bener aruba steel, aluminum aser autos densema Trump indang tariffs karbo appeals court obendang nung maden. Yangji pa mezüng kümsük mapang China dang Trump-i tariffs meshiba maden, koba taoba tir Joe Biden-ia meshi.

Tariffs ya agentsüsa akumnungbo, sorkari meshia aliba import taxes karbo meyiptsütsüsa akumtsü, koba ajanga US Treasury nung senotsü tsütsü tapok tulu apatsü ta sorkari ashir.

Pakistan southwest tsütsü nisung 13 pokset, 30 yiru

Quetta, Rongjui/September 04 (Agencies): Pakistan southwest tsütsü Mongulbar aonung nationalist party ka bhukumer tem rally ka nungi ainshiba mapang stadium ka kimalen suicide bomber kati temang nung bomb alenoka bener arua pa sasa pokdaktsüba nung nisung 13 asü aser 30 yiru, ta police aser mozüki ketdangsür temi Bodhbarnü ashi.

Yangji aliba police tekolak Majeed Qaisrani-i ashiba agi, Balochistan province yimtiba Quetta tezülen stadium anasa leper ka anasa iba lendong ya atalok.

Sorkar indang mozüki ka asoshi odongtar Waseem Baig-i ashiba agi, nisung tasü mang 13 den yirur alir nisung aika bener aru.

Iba lendong agütsüba atema tang tashi shingaia tenüing agia mali.

Nationalist lenir aser taoba mapang iba province indang chief minister inyaka alisang Sardar Ataulah Mengal asüba anogomung bilemteta iba rally ya ayongzüka liasü.

Iba lendong nung Balochistan National Party lenir Akhtar Mengal meyirur, saka asürtem aser yirurtem rongnung pa bhukumer kar dena lir, ta police tanishir Usama Ameen-i ashi.

Mengal ya sorkar anemer nübu tejangja ka lir aser samar aliba Baloch nationalists tem chioktsü khanga aiben rallies ayongzüker.

Balochistan Chief Minister Sarfraz Bugti-i iba lendong ya nisung meimchir indang tsükchir tasü mait mapa inyakba lir ta aitsü aser yirur alir tajungtiba nung anepalutsü aser aibelener nem ochi obendang agütsütsü asoshi temaba jenjang nung bushisüngdangtsü totuyuba agütsü.

Islamabad nung Interior Minister Mohsin Naqvi-ia iba lendong aitsü aser India-i yariba kiralongrar aser par facilitators temi linük raksatsütsü meranga civilian tem dak tenük yoker ta aitsü. Ajisüaka pai aitsüba medentsü kuli kecha magütsü.

India-i Pakistani Taliban aser Baloch separatists tem yarir ta ita ishika Pakistan sorkar aser Bugti nungeri tai tonglokja arur, koba New Delhi-i magizüker.

Balochistan nung mapang talangka nungi telungpur tebilemstü lia arur, aser Balochistan Liberation Army ama telok balalai central sorkar nungi nüjiso meshir. Separatists temi timba security forces aser Pakistan indang Punjab province nungi mapa inyaker dak tenük yoker.

Ketdangsür temi telungpur tebilemstü ajema kumogo ta shiaka region nung azüdokshi manener.

July ita Quetta nungi Punjab province-i aoba bus ana Balochistan nung highway ka nung anendakja nisung toku pua bener oa tepset. Iba ama lendong agütsüba ya timba BLA

teloki tenüing agia lir.

Pakistan northwest tsütsüa telungpuri amakba tali akumer.

Bodhbarnü Khyber Pakhtunkhwa province nung aliba Kurram district nung prangbong bena alirtemi gari ka nung injang khalokja nisung pongu khaset, ta yangji aliba police tanishir Hameed Hussain-i ashi. Lendong agütsür ya kanga kera anasa aliba tenem leni jena ao aser iba lendong nung asürtem ya Sunni Muslim nungertem lir, ta pai ashi.

Kasa province kübok Bannu district nung anogo ka tejakdang telungpur tem paramilitary Federal Constabulary indang headquarters telungi aitsü merangba mapang khatap dang sepai trok aser lendong agütsür pongu asü, ta yangji aliba police aser mitkar temi ashi.

OFFICE OF THE

AOLI LONGPOK SEMCHIR

LEMTUR TELONGJEM

DIMAPUR -797112, NAGALAND.

Ref. No._____.Date : 04-09-2025.

KONANG TETUSHI AGÜTSÜR

Aoli Longpok Semchir Lemtur Telongjem, Dimapur Unit nungi asen lenir L. Bendang Lemtur (Süngratsü) aser Atula Ben Imti (Longjang) jala **Dr. Nokmedemla Lemtur**, lai University of Gottingen, Germany nungi *"Medieval & Modern History"* nung Doctorate jenjang anguba takok tulu asoshi la nem Aoli Lemtur Dimapur Mendenti ajanga konang tetushi agütsür.

Ano, maneni tarutsü nunga Tsüngremi la taküm temaba jenjang nung ajungketa amshiangma.

Sd/-(MASATOSHI)Sd/-(R. SOSANG LEMTUR)

Tir.Tongti Zülur.



OFFICE OF THE

KANGTSUNG SENSO MUNGDANG

P.O. Tuli - 798618

District : MOKOKCHUNG, NAGALAND

Email: kangtsungsensomungdang@gmail.com

KUKUA AITSÜR

Tanü tangatetba putu tensa ka nung alima meimchir libaliru tajungtiba leni tazüokba taküm aser alima temzüng ozüing shidak bentshia lilepdang Mr. Rongpangkangzük Kangtsüing senso kati pa shi jangraba maziokteti tanur tetsür chanu ka tarutsü taküm tia raksaja alima meimchir temzüng ozüing anema tim masüba inyakogo, aser Kangtsüing sensosanger dangi maksü bentsür arutsüogo, ibaji KSM-i kangasa kukua aitsür.

Pai tia raksar taküm aser kibong nem Tsüngremi tesü nep tia tajung moajangma.

Temzüng ozüing o bendangertemi tekaratiba nung ochi obendang agütsüdaktsürner.

Sd/-(WB. S. IMDONG)Sd/-(BENDANG IMSONG)

Tir.Tongti Zulur

Kangtsüing Senso MungdangKangtsüing Senso Mungdang

OFFICE OF THE

DIMAPUR DIBUIA SENSO TELONGJEM

DIMAPUR-797112, NAGALAND

METETDAKTSÜR

Forest Colony (Dimapur) nung alir tzümar ka tenüing agi Moameren Ao pa ya dang Forest Department nung peon teinyakdak lir.

Pai ozüing anema Dibuiya yimtsung (Mangkolemba sub div. Mokokchung District, Nagaland) tenüing amshia documents aika yanglua amshiba, aser Dibuiya nunger tenüing temer ST/IIC yanglutsü lia putet.

Anungji, DDST-i iba tsümarsang ya onok yimer sosem mesüra züngsem ka masü, aser tarutsü nung iba nisung aser par chimnur-i yangluba documents ajanga timtem kar danga Dibuiya yimten dangi bener arura, ozü yimten-i kecha khuret magizüktsü ta yimjak nung metetdaktsür.

Pa indang Documents nung amshiba tenüing temji yamai:

Tenüing : Moameren Ao

Tebu tenüing : Watilemba Ao (Birth certificate /School certificate)

Otinungba Ao (EPIC card)

Odilemba Ao (Aadhar card)

Otinungba Ao (SBI Pass book)

Odilemba Ao (Govt ID)

Otinungba Ao (PAN card)

Tetsü Tenung: Amongla Ao. (Birth certificate)

Imlila Ao (ST/IIC application)

Sd/-Sd/-

Afong WallingJangjilong Longchar

PresidentGeneral Secretary

GOVERNMENT OF NAGALAND

DIRECTORATE OF TECHNICAL EDUCATION

NAGALAND : KOHIMA

NO.DTE/SCHO-10/2024/

Dated, Kohima the 3rd Sept. 2025.

NOTIFICATION

It is hereby informed to all the general public and the student community that the competent authorities to issue "Family Income Certificate" designated by the state Government vide notification NO.HTE/HE/SCHO/20-10/22/893, dated the 30th July 2025 for ST students applying for AICTE Scholarship and State Technical Scholarship.

The following points may be noted :-

- Students & Institutions are instructed to go through the guidelines given in the portal before proceeding to fill up the online form.
- Students belonging to Scheduled Tribes of Nagaland pursuing (Diploma/Undergraduate and Post graduate courses in Engineering (both Fresh and Renewal) within India, recognized by AICTE & Council of Architecture to complete online registration for scholarship.
- The portal shall be open w.e.f **1st October 2025 to 31st December 2025.**
- After successfully applied online, hard copy of the said application should be submitted to the office of the Department of Technical Education on or before 20th January 2026 after which no forms will be accepted.

Application can access the portal through the URL:https://scholarship.nagaland.gov.in

(ER. VIPULHOU LHOUNGU)

Director

United Brothers Club jersey sayaogo



United Brothers Club indang jersey sayaba sentong nung MP Supongmeren Jamir aser tangartem tangokba noksa nung angur.

Kohima, Rongjui/September 4 (TYO): Lok Sabha MP, S. Supongmeren Jamir-i Bodhbarnü United Brothers Club, D. Block Kohima indang jersey sayatsüogo.

D.Block Council Hall nung sentepa aliba lokti den o jembiba mapang Jamir-i, asayartem dang asaya nung temaba jenjang tongtettsü atema taküm yimya yimpong

azüoktsü aser coach o taintem akümtsübuttsü ajungshia liasü.

Supongmeren-isa, asaya nung takok angutsü atema discipline aser team spirit ji kanga tongtibang lir, ta ashi.

United Brothers Club indang jersey ya Ronald Chasie (Travel), Khrieletuo Belho (Home) aser Teisongulie Dziivichii (Away) nungeri sponsor asü.

Sentong nung James Yhome-i United Brothers Club nungi asayartem metetpela liasü.

Jersey sayaba sentong ya Christina Yhome lenisüba nung agi aser Associate Pastor BRC Khariizou Priya Thapa-i Tsüngrem temaotsü meshizüka sarasadema liasü.

Sentong nungsa Ronald Chasie-i tepela o lemsatapa liasü.

2buba Nagaland Junior Athletics Championships ayonger

Dimapur, Rongjui/September 4 (TYO): Nagaland Athletics Association-i sangdong ka ajanga 2buba Nagaland Junior Athletics Championships 2025, September 10 nü Indira Gandhi Stadium, Kohima nung asayatsü ta metetdaksüogo.

Iba asayamung ya tetsür aser tebur naprongla atema teküboklen agüja aliba category balala atema asütsü.

Kümsük balala : U-14,

U-16 & U-18.

Asayatem:

U-14 YEARS (tetsür/tebur)

1. Triathlon (A) 60m, Long Jump (5m Approach), High Jump (Scissor)
2. Triathlon (B) 60m, Long Jump (5m Approach), Back Throw (1kg Shot Put)
3. Triathlon (C) 60m, Long Jump (5m Approach), 600m

U-16 YEARS

Tebur: 60m, 600m, High Jump (Scissor only), Long Jump (5m

Approach), Shot Put (4 Kg)

Tetsür: 60m, 600m, High Jump (Scissor only) Long Jump (5m

Approach), Shot Put (3 Kg)

U-18 YEARS

Tebur: 100m, 200m, 400m, 1000m High Jump, Long Jump, Shot Put (5 Kg)

Tetsür: 100m, 200m, 400m,

1000m, High Jump, Long Jump Shot Put (3 Kg) District balala athletics association tem shirnoki district junior asayamung ayongzüka asayaogo, p;arnoki 2buba Nagaland Junior Athletics Championships 2025 nung asayatsü atema asayartem yoktettsü.

AFI-UID shitak maliba asayartem iba asayamung nung masayatetsü. U-16 & U-18 nung asayar ka asaya ana nung asayatetsü aser U-14 years atema Triathlon event 1 asütsü. District ajaki asaya shia asayar anana yoktettsü. Asayamung atema züngoksemtsü asoshi tatembangbuba anogoji September 6 asütsü.

Asaya shia Registration fees sen 100 asütsü. Asayamung nung shilem agirtem anentsü aser chiajemtsü atema peisasa anepalutsü.

Iba asayamung nung takok tajung ngua asayaba asayartem taruba 36buba East Zone Junior Athletics Championships 2025 nung Nagaland tenüng nungi asayatsü atema shimtsü. Osang tejangjaba agitsü atema Purna Konyak, Senior Joint Secretary (9402681057), aser Moalong Jamir Technical Committee Member (8787852190) na den t o n g t e p r a t e p t s ü metetdaksüogo.

US Open: Sinner aser Aliassime na semifinal asayatsü



Jannik Sinner

Felix Auger-Aliassime

Rongjui/September 4, 2025 (Agencies): US Open tebur kija asaya tesüsabuba koker alisang Jannik Sinner-i quarterfinal nung külem Italy nunger asayar Lorenzo Musetti koka US Open semi-finals tongtetogo.

World No. 1 asayar yagi Arthur Ashe Stadium nung iba asaya ya 6-1, 6-4, 6-2 agi ayong ayonga koka liasü. Sinner aser Musetti na ya medemer tajung lir, saka asaya tenzükba sülen Sinner-i kecha taochi makai asaya-a asaya kokogo.

Sinner semifinal nung Canada nunger asayar Felix Auger-Aliassime den asayatsü shibai Alex de Minaur kokogo. Tena taoba mapang asembe asayaogo aser asaya anabo Aliassime-i koka lir, ajisüaka taoba ita Cincinnati nungbo Sinner-i pa koka liasü.

Arishi küm 24 tain Sinner-i taküm kanga junga asaya arudar aser pai Grand Slam asem nungi anabo kokogo aser tang tasembuba akoktsü merangdar. Pai French Open nung Carlos Alcaraz makok.

Bodhbarnü tebur kija asaya nungsa Felix Auger-Aliassime-i kanga meranga asayar 4-6, 7-

6 (9/7), 7-5, 7-6 (7/4) agi Alex de Minaur kokogo.

2021 U.S. Open nung semifinal tonga asayaba sülen pa tang mezügbuba Grand Slam ka nung semi-final asayatsü lir. Kasa asayamung tetsür kija asaya nung Amanda Anisimova-i world No. 2 Iga Swiatek koka semifinal tongtetogo. Ita ana tejakdang Wimbledon nung Swiatek makokba sülen Anisimova-i New York nungbo la koka mang yangogo.

America tsürla yagi asaya kanga junga asayateta 6-4, 6-3 agi world No. 2 aser reigning Wimbledon champion ya koka liasü.

Tetsür kija asaya nungsa Naomi Osaka-i iba asayamung nung maneni kanga junga asaya 11th seed Karolina Muchova 6-4, 7-6 (7/3) agi straight set nung kokogo.

2021 küm Australian Open akokba sülen Osaka tang Grand Slam ka nung tajungtiba asayadar. La semifinal nung Anisimova den asayatsü.

Maneni tebur tarep asaya nung India nunger asayar Yuki Bhambri-i pa indang New Zealand nunger partner

Michael Venus den senteper quarter final asaya koka pa indang career nung tang mezügbuba Grand Slam ka semifinal tongtetogo.

Quarter nung tenati 11th-seeded tarep Nikola Mektic aser Rajeev Ram 6-3, 7-6, 6-3 agi koka liasü.

Amit Mishra cricket asaya nungi anisüngzüker

Rongjui/September 4, 2025 (Agencies): Arishi küm 42 tain India nunger cricket asayar tejen Amit Mishra-i küm 25 asayaba sülen professional cricket asaya nungi anisüngzüksü telemtetba agiogo.

Leg-spinner yagi India tenüng nungi Test 22, ODI 36 aser T20I 10 nung asayaogo aser iba mapang wicket 76, 64, aser 16 ta agia liasü. Pai pa asaya nungi anisüngzükbba Brehostibarnü sangdong. Pai, mapangshia yirua aliba aser lanur asayartem nem maangka agütsütsü mechi pa asaya nungi anener ta ashi.

"Küm 25 tajangshiba tajung aiaka ajangshia asayaogo. Ni BCCI, administration, Haryana cricket association, support staff, külem asayartem aser ozüing kibong dang kanga pelar, shirnoki ni tanen makai nongitogo," ta Mishra-i ashi.

"Ni fan tem danga kanga pelaba lemsatepner, shirnoki ni kong aser koba mapa nung asayadir asayaka ni nongita yariba aser kü dang temeim sayuba ajanga kü asayaba mapang teti menungra bilemtettsüsa tajungba kümdaktsüogo. Cricket asayaba



mapang tajangshiba aika ajangshioogo aser aika angazükogo, koba ni taküm tepeyong bilemtettsü," ta paisa shisem.

Mishra ya international jenjang nung mezügbuba 2003 küm Bangladesh den ODI tri-series nung asaya. Pa Test nung mezügbuba 2008 küm Australia den Mohali nung asaya aser iba asaya nung pai wicket pongu agia liasü.

2013 küm pai Javagal Srinath-i world record yanglur aliba menepa Zimbabwe den ODI asayaba mapang asaya

pongu nung wicket 18 agi. Pa 2014 küm Bangladesh nung T20 World Cup nunga asayaogo aser iba mapang wicket 10 agia liasü.

Pa 2017 küm tesüsabuba India tenüng nungi asayaba sülen pa domestic cricket aser IPL asaya aruogo. Pa IPL 2024 nung Lucknow Super Giants nungi Rajasthan Royals den tatamsa asaya liasü.

IPL nung pai asaya 162 nung wicket 174 agir tang asaya nungi anener. IPL nung pa indang average ji 23.82 aser economy rate 7.37 lir. IPL puti otsü nung hat-tricks asem agiba asayar pa kija lir.

2008 küm Delhi Daredevils, 2011 küm Kings XI Punjab aser 2013 küm Sunrisers Hyderabad nungi asayaba mapang pai hat-trick ya agia liasü.

Coaching, commentary aser lanurtem aniteta cricket asaya den maneni sendaka alitsü Mishra sentong lir. Paisa, social media aser YouTube ajanga fan tem den sendakteptsü.

BILEMDANGANG

"Nai bilemba, jembiba aser inyakba kodang liromedemdir idangji tepela adoktsü."